



Tir Yimym

www.tirymim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymim@gmail.com

TAPAK 10 Yangia anidakangma :  Tir Yimym


 tirymim@aolima

 tir yimym

TAPAK 7

MIT Sports Analytics Conference
nung Rahul Dravid-i shilem agitsü

Osang tai agütsüba ajanga
mepetmesü adoker: PM



VOL. XVIII NO. 172 (ADOK 172) DIMAPUR

RASEMNÜ (WEDNESDAY)

RONGCHII (APRIL) 07, 2021

₹ 5.00

Nisung 2 taneptsü angur; 68,126-i vaccine agiogo

Kohima, April 6 (TYO): Mongulbarnü Nagaland nung nisung shinga dak-a COVID-19 aliba meputet.

"Tanü nisung shinga dak-a COVID-19 meputet aser Dimapur nung nisung ana taneptsü angur" ta Health & Family Welfare Minister, S Pangnyu Phom-i metetdaksü.

Nisung 12,365 rongnungi 11,982 taneptsü nguogo aser tang nisung 134 anepaludar, ta paisa ashi.

"Nagaland nung COVID-19 nungi taneptsü angurji 96.9% lir" ta Health & Family Welfare Department Director, Dr Denis Hangsing-ia ashi.

Nagaland nung COVID-19 puteter nisung 91 süogo saka parnok nisung 10 bo tanga timtem ajanga asü. Külén, nisung 158 tashi tanga state temi ogo, ta paisa metetdaksü.

"Tang anepalurtemji Kohima nung nisung 123, Dimapur nung 9 aser Tuensang nung 2 lir. Parnok shinga dak-a shirangba

yimya mali" ta Dr Hangsing-ia shisem.

"Nagaland nung COVID-19 alitsü akok ta temolung melemi bilemba sample 1,37,282 tendangogo. RT-PCR ajanga sample 75,570, TrueNat ajanga 37,545 aser Rapid Antigen Test ajanga 24,167 tendang" ta Dr Hangsing-ia metetdaksü.

Nagaland nung Hombar tashi nung nisung 68,126 nem COVID-19 vaccine (covishield) dose 93,707 agütsüogo, ta State Immunization Officer Dr Ritu Thurr-ia ashi.

Vaccine agirtemji frontline workers 38,286, healthcare workers 12,231, teintet rogo 12,201 aser arishi küm 45 ser temapur 5,036 lir, ta paisa metetdaksü.

Nagaland nung healthcare workers 8,490, frontline workers 16,597, teintet rogo 306 aser arishi küm 45 ser temapur 188 tashi vaccine dose anaprong agiogo, ta Dr Thurr-ia shisem.

JCPI-i state sorkar dang nenshir

Dimapur, April 6 (TYO): Nagaland Chief Minister dang March 31, 2021 tashi nung RIIN mapa küma tenzüksü atema ozüng agüjang ta March 19, 2021 nü shidi ka züluba nenshir, ta Joint Committee for Pervention of Illegal Immigrants (JCPI)-i tanü metetdaksüogo.

ILP aser RIIN atema 'cut-off year' ka dang amshitsüla aser ibaji December 1, 1963- Statehood Day asütsüla, ta JCPI-i maneni jangjatsüogo.

Nagaland sorkari iba telemteba magiteter anungji tarutsü asoshi telemteba agitsü atema senden ka amentsü. Iba senden nung tongti

kin hohotem adentsü mepishir, ta JCPI-i sangdong ka nung metetdaksü.

Senden amentsüba tesem, anogo aser mapang tekaratiba nung sangoktsütsü ta parnokisa ashi.

"March 19, 2021 nungi tenzüka JCPI-i signature campaign ka tenzüko aser iba nung lisopur senso ajaki shilem agitsü aser pusema nungittsü mepishir. Maneni, JCPI pusemertemi tarutsü nunga yariteptsü renema atatsü ayongzüker" ta JCPI Convenor Atomi Swu aser Secretary Tia Longchar nati külem sangdong nung metetdaksüogo.

NITI Aayog CEO-i Nagaland Governor den ajurutepe

Dimapur, April 6 (TYO): April 6, 2021 nü CEO, NITI Aayog Amitabh Kant-i Raj Bhavan Kohima nung Nagaland Governor, RN Ravi den ajurutepe senden ka menogo.

Iba mapang Amitabh Kant-i Nagaland state nung aser talisa Aspirational District- Kiphire dak sendakba onüktem benoka lemsatep, ta PRO to Governor-i sangdong ka nung metetdaksü.

CEO, NITI Aayog-i Governor Ravi den health, education, livelihood, infrastructure indang onüktem

jembi aser Aspirational District ka nung Deputy Commissioner kanga melenba atema tebilemtsü abenba lemsatepa liasü.

Governor Ravi-i Amitabh Kant dang Nagaland nem balaka temolung agütsütsü ayongzüker.

"Linük den liromedema aintsü atema teyari balaka nüngdakba state ji Nagaland lir" ta Ravi-i ashi.

Amitabh Kant-i April 7, 2021 nü Kiphire semdangtsü aser idangji mapatong balala inyakba meyipa reprangshitsü ta PRO to Governor-isa metetdaksü.

Dimapur nung NSCN(IM) office ka shibangtsü

Dimapur, April 6 (TYO): NSCN(IM)-i truck gari anishir ka ozüng alema pua lir ta ken o benokba sülen Dimapur Police-i Hombar nü Diphupar 'B' village G-Khel nung NSCN(IM) indang office ka mita ao.

Iba office lapoktsü ozüngi memelar aser iba jagi police-i office shibangtsü aser Chumoukedima Police Station nung ken o ka benokogo, ta Addl. Dy. Commissioner of Police/PRO, Dimapur-i sangdong ka nung metetdaksü.

PDA-i tenüngsang agütsüba sentong ayongzüka agi

Kohima, April 6 (TYO): Nagaland nung People's Democratic Alliance (PDA) sorkar küm asem abensaba tenüng nung aser ano 51-Noksen Assembly Constituency nung H. Chuba Chang-i tetokteper shinga melii takok anguba atema tenüngsang agütsüba sentong ka agiogo.

Iba sentong ya Chief Minister's residential complex nung State Banquet Hall nung agia liasü. Taküm March 8 nü PDA sorkar kümterer küm 3 abensaogo.

Sentong nung Chief Minister Neiphiu Rio-i tenüngsang agüja jembidang Noksen Assembly Constituency nung alirtem aser PDA teloktepi candidate tajungtiba aser nisung shitak shimetba atema tenüngsang agütsü.

Paisa BJP aser ticket meshir nisung pezüi Chuba Chang nem maongka agütsüba atema pelaba metetdaksü.

"Taoba election nung vote 500 shi kati NDPP den tamakok angur ex-NPF candidate Chingmak Chang dang pelar. Iba by-election nung inyakim tajung ka tenzüko aser party tashi angaba tatishitsü tajung sayuogo" ta Rio-isa ashi.

Prime Minister Narendra Modi, Union Home Minister Amit Shah aser BJP National president J P Nadda nung lenisüba nung India sorkari maneni yariba atema kanga pelar, ta paisa shisem.

Chuba ya lennir tejen ka lir aser aika ajangshia aruba nisung ka lir. Anungji pai PDA telok asoshi lenisüba tesayuba tajung agütsütsü imlar, ta CM Rio-isa metetdaksü.

"PDA sorkar kümterer küm 3 abensangogo aser iba mapang asenoki aka inyaktetogo saka iba mapang asenoki wara tulu ajurua

timtem ajuruogo. Sorkar kümstük nung küm ana anünga alibaji kanga tongtipang lir aser iba mapang asenoki manifesto nung nangzüka aser Common Minimum Program nung lateta alibatem inyaktsüla" ta paisa ashi.

"Asenoki nübertem dang parnok asoshi inyaktsü nangzüko aser iba amaji inyak arur. Staff Selection Board tenzüka, VIP sobaliba agienba, e-governance tajungba kümdaktsüba aser ketdangsübaren nung technology amshiba ya sorkari tongti süa inyakba mapatem lir" ta CM Rio-i metetdaksü.

Paisa PDA nung adenertem aser party lennirtem dang külemi nübertem nem sorkari inyakba mapatem aser mapatongtem metetdaksütsü ayongzüker.

"Nübertemi asenok dak teimla tulu lir aser asenoki item atongtsü merangtsüla" ta Nagaland CM-isa ayongzüker.

Tawa Delhi-i aoba indang olen ka ashidang "Leader of Opposition-i anir Opposition nung asenok medemertem den külemi NNPGs aser NSCN lennirtem den sendentem menogo" ta Rio-isa ashi.

"Naga yimten tebilemtsü atema Nagaland Assembly nung MLA tem party toktsür ka küma longjemogo. Iba ya yimjung maparen tajungba kümdaktsütsü aser tekaratiba nung yimten latettsü atema lir" ta paisa shisem.

Paisa Naga yimjung olemtep nung dena alir ajaki nübertemi aginüba ama yimten tekaratiba nung latettsü atema inyaktsü ayongzüker.

"CM Rio lenisüba kübok BJP-NDPP teloktemi nübertem molungjang koktettsüsa mapa

tajung inyaker" ta Nagaland Deputy Chief Minister aser BJP legislature party leader, Y Patton-ia ashi.

PDA sorkari Nagaland state aser nübertem renlokdaaktsütsü atema tenangzüka nung mapa inyaker, ta paisa metetdaksü.

"Noksen nung alirtemi Chuba Chang den tetokteper shinga melii takok ngudaktsüba atema tenüngsang agütsür. BJP MLA ajak tenüng nung Chuba Chang nem tenüngsang agütsü aser pai kümstük pungububa atema MLA inyakdag PDA teloktep tashi itdaksütsü aser Naga nung taginüba tonga inyaktsü moatsür" ta Y Patton-isa metetdaksü.

Sentong nung PDA chairman aser NDPP president Chingwang Konyak-ia MLA Chuba Chang nem tenüngsang agütsü.

NDPP lennirtemi nübo tajung Chuba Chang shimetba atema BJP Nagaland-i pelar, ta State BJP general secretary Eduzu Thelu-o-ia ashi.

51-Noksen nung political party tanishirtem aser yimtsüng lennirtem dang pelar, ta paisa ashi.

MLA, H Chuba Chang-ia tepela o jembidang Tsüngremi pa nem maongka agütsüba atema pelaba metetdaksü.

NDPP ticket meshir 5 rongnungi lennirtemi pa nem ticket agütsüba atema paisa pelaba shisem.

Iba sentong nung mendenji Advisor aser BJP National spokesperson, M Kikon liasü aser State Chaplain Rev Yamyap Konyak-i temoatsü meshia sarasadem.

Sentong nung NDPP secretary general Abu Metha-i tesentepertem pela agizük aser NDPP working president & CEO IDAN Alettemshi Jamir-i anküp tepela o jembi.

COVID-19 wara tanabuba atema senden amen

Dimapur, April 6 (TYO): COVID-19 wara tanabuba prokshiba nung ajemdaker April 6, 2021 nü Directorate of Health & Family Welfare, Kohima nung senden ka menogo.

Iba senden nung mendenji Principal Director Dr. Kevichusa Medikhrü liasü aser pai COVID-19 wara tanabuba adoka prokshiba atema Nagaland state renema alitsüla ta ashi.

Department-i iba wara anema raratsü renema alitsüla. COVID-19 wara mezüng adokdang

asenoki tetsükdaktsü aser metokmeperi aika ajuruogo saka tangbo asenok renema atatsü mapang peria dang lir, ta pai ashi.

"Asenok mapang tatsüka anisüngzüko saka tang asenoki taoba nung ajangshiba nung ajemdaker renemtsüba mapang lir" ta Dr. Kevichusa-i ketdangsürtem ayongzüker.

Iba senden nung State Nodal Officer IDSP Dr. Nyan Kikon-i COVID-19 anepaluba aser inyakim indang metetdaksü aser State Immunization Officer

UIP Dr. Ritu Thurr-i COVID Vaccination indang osang lemsatep.

Senden nung Chief Medical Officers, Medical Superintendents aser Principal PMTI nungertem aden aser district ketdangsürtemi Personal Protection Logistics, Medical Oxygen Status, Equipment Status, Logistics for COVID-19 Testing: Consumables, Logistics for COVID-19 Testing: equipment & Status of Drugs osangtem lemsatepa liasü.

Assam Rifles-i CFRGs alema inyaksangshir: NSCN

Dimapur, April 6 (TYO): June 14, 2002 nü National Socialist Council of Nagalim (NSCN) aser India sorkar tsüngda arrtsü telatet makai Ceasefire tenangzüktep agiogo saka Assam Rifles (AR)-i temzüngtem lateta aliba alema inyaker.

AR-i ceasefire tangatetba raksatsütsü meranger aser iba ya Indo-Naga yimten olemtep asoshi tetsükdaktsü ka kümdaktsüogo, ta MIP, NSCN/GPRN-i sangdong ka nung metetdaksü.

April 4, 2021 ayaterm nung AR sepaitemi Dimapur nung

Kilonser Lenthalie'er mita ao. Pa ya Cease Fire Monitoring Cell (CFMC) nung züngsem ka lir aser AR-i Cease Fire Ground Rules (CFGRs) alema iba mapa inyakogo, ta MIP-i ashi.

Ministry of Home Affairs (MHA), GoI-i tuyuba nung ajemdaker AR-i mita aoer ta ashir saka iba yagi Cease Fire Monitoring Group (CFMG) Chairman mesüra CFRGs tenüng menüksür, ta parnokisa metetdaksüogo.

NSCN-i Indo-Naga ceasefire aser Framework Agreement nung nangzüktepa ama noktaka lir.

Anungji NSCN-i MHA dang AR-i NSCN züngsemtem mita aoba anentsü atema tetuyuba agütsütsü ayongzüker, ta MIP-isa ashi.

Indo-Naga yimten tebilemtsü tekaratiba nung latettsü atema AR/MHA aser NSCN tsüngda tesentaktep tajung alitsüsa saka ibaji maliba atema kanga sasar, ta parnokisa metetdaksüogo.

Assam Rifles sepaitemi Nagalim ajungaleni ki mita aoer aser taittsü kecha manguba kitem parnoki tanen makai mita aoba atema süngmanger, ta MIP, NSCN/GPRN sangdong nungsa shia lir.

DTF Kohima puri COVID-19 protocol amshiyim mita jaja



Dimapur, Rongchii/April 06 (TYO): District Task Force Kohima on COVID-19 pur ajungbena April 5, 2021 nü state yimtiba, Kohima nung COVID-19 protocol shidak amshir asü masü ta mita jaja, talisa nüburtemi amshiba tesemtem nung ajaki mask agi-magi repranga senzü aser tesem kar nung aliba dokan aser yimtung nung awareness agüja liasü. Iba mapang totuyuba nung aliba ama aibelener aika nem temerenshi agütsü aser nüburtem nem mask lema agüja liasü.

Nüburtemi mask agitsü

maneni ajungmesotsü nükjidong nung ajungbena mita aoba aser awareness drive ya agi, ta Additional Deputy Commissioner, Kohima N Bhavani Sri, IAS ajanga ashi.

Iba maparen ya district administration, police, medical department aser DB temi inyak aser tarutsü nunga nüngdakra iba ama maparen ya inyaksü, ta Sri-i ashi.

Nüburtemi pei sasa pei temang anepalutsü atema meteta alitsüla, ta SDO (C) Kohima R Daniel Angami-i ashi.

"COVID-19 wave tanabuba sashia akumba aser asen state

nung positive cases timba jangjatetba mechi asenoki nüburtem dang mask agitsü ajungshitsüsa akumer," ta pai ashi.

COVID-19 tashidak prokshia aoba nungi nokdangtsü asoshi nüburtemi inyaksü mapa tajungtibaji mask agitsüba ya lir, ta pai ashi.

Iba drive ya PHQ-BOC junction, main town, Old Tata parking- Keziekie, Razhu Point-Super market area, Jail colony junction, High School Junction-Sanuoru Bridge, Mohonkhola-Dzüvüru bridge aser Tinpati-Census Office road nung agia liasü.

Nüburtem tajungtiba nung tenzüksüla: Zhaleo Rio

Dimapur, Rongchii/April 06 (TYO): Sericulture, Excise aser Minority Affairs indang Advisor, Zhaleo Rio, shiba Dimapur District Planning and Development Board nung mendenpuba lir, pai DPDB Dimapur züngsem tasentem pela agizükba mapang parnok dang nüburtem tajungtiba nung tenzüksü ajungshia liasü.

April 2021 atema Hombarnü (April 5, 2021) Deputy Commissioner Dimapur indang Conference Hall nung Dimapur DPDB senden amendang Zhaleo-i nüburtem ajangzüksü aser temaba jenjangi ajungkettsü asoshi DPDB züngsemtem dang district administration, police aser ano MLA tem den tajungtiba nung amalitep akatsü

ayongzüka liasü.

DPDB senden ya district ajungtsü asoshi pei tangatetba lemsatepba aser shisa doktenba sabang ka lir, anungji Dimapur district kübok HOD temi shilem tali agitsüla, ta pai ayongzü.

"DPDB senden nung pei department inyakyim, takok anguba aser tamakok ajurubatema lemsateptsü atsüanem masütsüla," ta Zhaleo-i ashi.

Pai maneni Dimapur district nungi legislator tem danga DPDB senden nung adentsü mepishi aser 'ketdangsurtem asoshi lenmang sayur kaka südi,' ta ayongzüka liasü.

India nung state balala nung COVID-19 wave tanabuba agi kongshiba nung ajemdaker

jembiba mapang, Zhaleo-i District Task Force Dimapur dang COVID-19 protocol ketdangtsüba nung tali tashi itshitsü aser pei sasa pei dak temolung lemer malitsü ashi.

Senden nung Deputy Commissioner Rajesh Soundararajan-ia HOD tem dang COVID-19 wave tanabuba den raratsü asoshi renema alitsü auonhzük, kechiaser senzusempongertem asoshi Dimapur ya tiyongsü ka lir.

DTF Dimapur ajanga COVID-19 protocol maneni anogoshi benoktsü aser DMC ajanga dokan kibur ajunga nem COVID-19 protocol amshidaktsütsüla, ta pai metetdaksü.

(Maneni tapak 3 nung...)



COVID-19 mozü agütsütsü asoshi jembishinütsü atema Mokochung District Task Force on Covid-19 pur April 6, 2021 nü Deputy Commissioner, Mokochung indang Office Chamber nung senden amendang tangokba noksa ka yangi angur.

Sorkar nem VCM tenüng tekeratiba nung agüjang: DC Kohima metetdaksü.

Dimapur, Rongchii/April 06 (TYO): Village Council tentetshitsü dak sendakba nung VCM proposal agütsütsü anogo tatembang ya April 30, 2021 tashi atsülangtsüogo, ta Deputy Commissioner, Kohima, Gregory Thejawellie ajanga ADC Tseminyu/Chiephobozou; SDO (C) Jakhama/Sechu/Sadar; EAC Kezocha/Botsa/Tsogin nem sangdong ka ajanga metetdaksü.

Sorkar nungi approval angutsü atema yimtsüng kobaisa VCM proposal magütsü ali, parnoki April 15, 2021 tashinung agütsütsüla, ta Deputy Commissioner, Kohima ajanga

Maneni Village Council Member (VCM) atema tenüng agüja alir ajungai Nagaland village and Tribal Councils Act 1978 indang Section 16 (6) aser 16 (8) nung shia aliba ama yimtsüngtem nem tsünglanglen agüja aliba indang sangdongdaksütsü asoshi nüngdakba totuyubatem agütsütsüla:

1. Pa Sorkar mapa nung itasen agir ka masü ta sangdongtsüla.
2. Pa danga Village Council nung züngsem masü ta sangdongtsüla.

CANSSEA 2021-2023 pur sanen luden senden amen

Dimapur, Rongchii/April 06 (TYO): Confederation of All Nagaland State Service Employees Association (CANSSEA) of 2021-2023 pur sanen luden senden mezüngbuba Headquarter Office, Kohima nung mena liasü.

Iba senden nung parnoki tsünglanglen agüja alibatam pangzünga liasü:

1. Sorkar tenzüker ya Sorkar indang teka aser tashikang lir. Anungji Nagaland nung aliba

nüburtem aintsü aser ajangzüksü atema Sorkar tashi itdaksütsü asoshi CANSSEA-i inyaksü pangjem.

2. Züngsem ajak dang koba tesem nungsa lidir liaka ochishia aser bendanga agütsür nübur tenzüksü pangjem.

3. State aser nüburtem ajangzüksü aser aintsü atema Nagaland sorkar kübok aliba association ajunga den külemi inyaksü pangjem.

NPF Central Office Bearers senden ayonger

Dimapur, Rongchii/April 06 (TYO): Naga People's Front tir, Dr. Shürhozelie Liezietsu ajanga Central Office Bearers (COB) senden ka Central Office HQs Kohima nung April 14, 2021 anepdang 11:00 ako nungi amentsü ayongzüko.

Iba senden nung Central Office Bearers ajak arua adentsü mepishir. Senden nung COVID-19 indang Standard Operating Procedures (SOP) akang-akanga amshitsü, ta Naga People's Front indang tongti zülur, Achumbemo Kikon-i sangdong ka ajanga ashi.

Longleng district nung FOCUS kübok metsü lema agütsü



Dimapur, Rongchii/April 06 (TYO): Fostering Climate Resilient Upland Farming System in Northeast-Nagaland (FOCUS Nagaland) ajanga Longleng District kübok project village tem atema March 29, 2021 nü District Agriculture Officer (DAO) Office, Longleng nung Kharif seeds lema agüja liasü. Fostering Climate Resilient Upland Farming System in Northeast-Nagaland (FOCUS Nagaland) ya IFAD ajanga senotsü teyari agütsüba project ka lir.

Aluyimer temi junga züsentetba atema DAO & DPM of FOCUS-IFAD, S. Yongchang Phom ajanga pelaba lemsatep aser ano maneni

project nungi tajangzük shidak angutsü asoshi nendaka agüja inyaksü ayongzüka liasü.

Tashidak wara tamajung agi alima tesem ajunga süngdakjaka Kharif season mapang April 2020 nung FOCUS ajanga metsü-jang agüja liasü, koba pei asoshi züsenttsü lemezükba liasü, linük ajunga shibanger aliba mapang anasa aliba yimtsüng aser shishilempadak product tem lema agütsüba nung yaritepa liasü, ta paisa ashi.

Aluyimer nem Kharif metsü-jang tendanga tsünütsü agütsü, aser yimtsüng tenüng nung parnoki metsü-jangnatsü agizük aser item metsü anepalutsü jangra alir ajunga nem shidak agütsütsü metetdakja liasü.

SIRDajangaDirector den tepila sentong agitsü

Dimapur, Rongchii/April 06 (TYO): Department of State Institute of Rural Development, Nagaland indang Director menden yutsütsü alila, Limasenla Jamir den tepila sentong ya April 07, 2021 anüngdak 12:00 ako nungi tenzüka SIRD Auditorium, Kohima nung agitsü, ta sangdong ka ajanga ashi.

Iba tepila sentong nung Advisor, SIRD, Fire & Emergency Services, Relief & Rehabilitation, Pohwang menden yutsütsü alila, Konyak aser Commissioner & Secretary, RD, Neposo Theluo, IAS nati shilem agitsü. Iba sentong nung Joint Director SIRD, Imlimenla Longkumer menden asütsü, ta sangdong ajanga ashi.

CRPF jawan Shambhu Roy mang Tripura tonga bener aruogo



Agartala, April 6 (Agencies): Mongulbarnü CRPF jawan Shambhu Roy indang tasü mang Tripura nung par yimtsung tonga bener aruogo.

Shambhu Roy ya North Tripura district kübok Bhagyapur nung liasü. Mongulbarnep pa indang tasü mang MBB Airport, Agartala tonga bener aru.

Tripura MP Pratima Bhowmick also paid tribute to

martyred Shambhu Roy.

Iba mapang CRPF jawan nem naro yuja tetushi agütsü aser Tripura MP Pratima Bhowmick-ia asür Shambhu Roy tushia liasü.

Tripura nungi CRPF jawan Shambhu Roy ya Honibarnü Chhattisgarh kübok Bijapur nung Maoist temi amakdang asü.

Pai pa tebu, tetsü, tenu tebur ka aser tetsür ana toktsür alima nungi pilaogo.

Shambhu Roy ya CRPF indang commando wing-Commando Battalion for Resolute Action (CoBRA) nung züngsem ka liasü.

Hopta ana tejakdang pa Chhattisgarh-i aoba liasü ta par kinungertemi ashi.

Chhattisgarh nung Maosit temi amakdang sepai 22 tashi tepsetogo.

Iba lendong nung Assam nungi CRPF jawan 2 asü.

June 25 nü Manipur ADC election agitsü; ATSUM-i lungkak aitba manener

Imphal, April 6 (Agencies): Manipur sorkari June 25, 2021 nü hill district tem nung Autonomous District Council (ADC) election agitsü osang metetdaksüogo.


Iba osang ya Manipur Additional Chief Secretary (Tribal Affairs and Hills), Letkhogin Haokip-i sangoktsü.

All Tribal Students' Union Manipur (ATSUM), Demand Committee for Creation of ADCs aser sorkar department balala tsüngda senden amenba sülen sorkari iba osang metetdakja liasü.

Ajisüaka, ATSUM-ibo June 25 election agitsü lemtetbaji sorkari dang lemtetba lir aser Hombar nü senden amendang state sorkar aser ATSUM tsüngda iba atema tenangzüktep kecha maliasü ta ashir.

ATSUM-i ADC indang election agitsü atema maneni takhangba agüja lungkak aittsü ta metetdaksüogo.

Hombar nü ATSUM züngsemtemi hill district tem nung sorkar office tem aser bank tem shibangtsü. Sorkari hill district tem nung ADC indang election agitsü osang mesangoktsüba anema parnoki iba mapa ya inyak.



Manipur nung ADC indang election ya yaküm June ita agitsüba liasü.

Ajisüaka, Hill Areas Committee (HAC)-i ashiba nung ajemdaker State Cabinet sorkari ita 6 atema ADC election magii atatsü telemtetba agi.

ATSUM-i lungkak aitba pusema Kuki Students' Organization (KSO) indang Moreh unit-ia Moreh nung range forest office dena office aika shibangtsü.

Parnokisa bank aika shibangtsü aser poster maloka yutsü.

Senapati district headquarters nunga ATSUM züngsemtemi office aika shibangja liasü.

EC-i Mizoram nung Serchhip by-election thinentsü atema telemtetba magi

Aizawl, April 6 (Agencies): Election Commission of India (ECI)-i Mizoram kübok Serchhip assembly constituency nung by-election thinentsü atema telemtetba kecha magi lir.

ECI-i April 17 nü Serchhip by-election agitsü aser May 2 nü votes azüngtsü lemteta lir.

Mizoram chief minister Zoramthanga aser political party aikati ECI dang election agitsüba aser vote azüngba anogotem thinentsü atema mepishiogo.

Mizoram nung Khristan tamanger kar aser talisa

Seventh-Day Adventist Church atema Honibar ya temeshi anogo ka lir. Parnoki Honibarnü Sabbath amonger aser ano Deobarji Khristantem asoshi sodi anogo ka lir.

Seventh Day Adventist Church-i ashiba agi parnok züngsem aika vote enoktsüba nung shilem magitetsü kechiyong Sabbath anogo lir.

"Tawa tu ECI-i state chief electoral officer (CEO) dang Serchhip constituency nung voters aser state nung Seventh Day Adventist Church züngsemtem indang osang

asüngdangogo" ta Mizoram nung joint chief electoral officer, David Liansanglura Pachau-i ashi.

Mizoram nung Seventh Day Adventist church züngsem 16,845 lir.

Serchhip Assembly constituency nung vote enoktsür ajak agi nisung 19,295 lir aser parnok rongnung tetsür 10,193 dena lir.

Osang angazükba agi, iba constituency kübok polling station 29 nung electronic voting machines (EVMs) amshia vote enoktsütsü.

JANGPETKONG STUDENTS CONFERENCE (JKTM)

In collaboration with

IMPACT HUB INSTITUTE FOR COMPETITIVE EXAMINATION

Erstwhile Sachdeva Coaching Institute

ANNOUNCING

Open Scholarship Test for all eligible students from Jangpetkong Students Conference (JKTM).

Course fee for top 5 students fully paid by sponsorer including hostel facility.

Special Impact Hub Scholarship for all aspirants depending on marks achieved.

Venue:
Near SBI Main Branch
Opp. Office of the
Commissioner of Police
Dimapur

Contacts: +91 70056 54206
+91 89741 95003

"An investment in knowledge pays the best return"

Thank you!
Dr. Longrineken,
Honourable Advisor:
National Highways
Treasuries & Accounts;
Govt' of Nagaland
for sponsoring
5 students.

Date 13th April 2021
Time 11 am - 1 pm

Syllabus
Reasoning
General knowledge
Current affairs

Batch Starts
15th April 2021



South Sikkim district kübok Tingley nung morok mi tulu ka adoka arongba angur. Hombar aonung nungi Nagi forest nung morok mi adoka aronger aser Namchi o Rabong nungi mi ensepertemi mi remseptsü meranger. Gonjang Monastery anasa mibo azüoktetogo saka aremlen ano mazüoktet lir ta Mongulbarnü forest ketdangsürtemi ashi.

Nüburtem tajungtiba... (TAPAK 2 NUNGI...)

Dimapur district kübok Aghunaka ya Aspirational block asütsü iba senden nung shimtet aser iba atema tekeratiba nung committee ka tenteta osang sangdongtsü, ta DC Dimapur ajanga ashi.

Iba senden nung society registration, Concern Kids Montessori School nungi Concern Kids School 4th Mile ta tenüng melentsü indang onüktem benoka jembia liasü.

Senden nung Rising Montessori School Toulazouma Village Dimapur, Sunrise Preschool 7th Mile

Chumukedima tasen lapoktsü atema agizüker sorkar dangi yok, Riverine School Thilixu Village, Dimapur and Quest Fulfill School, Model Colony, Purana Bazaar, Dimapur upgrade asütsü indanga jembia liasü.

Maneni Ebenezer High School, Dhansiripar nung aliba Selouphe village-i belener aotsüaser Sovima F Khel nung aliba Logos School, Kuda Nagarjan B Khel-i belener aotsü indanga senden nung agizüka temaba ketdangsür dangi yoktsü lemtet.



TIR YIMYIM YIMOBILEM (EDITORIAL)

DIMAPUR RASEMNÜ, RONGCHII (APRIL) 07, 2021

AKSÜRA ARUR

Asenok ama akshi chinürtem asoshi osang tamajung kaji, Nagaland tesem balala nung aksüra wara agi tonger ak asü tenzükba osang lir. Atangji, nisungtemi achiba shi rongnung akshisa tamajungba saka asenok tebang dangbo akshisa tajungba, anungji benjong nung akshi melira benjong meshizük amai bilemer aser ak shi hopta ka mechira küm junga akshi den kena mechiyong dang amai bilemer. Iba amaji akshi sapua achirtem asoshi tang ama aksüra wara aruba ya kanga tekümdangtsü mapang asütsü. Ak ajeptsü ya tasak aser asenoki kanga sapua achir, anungji küm shia ak shi nung jenjang tupet atur, anungji aksüra wara aruba ya ak metsürtem asoshi kanga takoksa tulu lir. Tashidak aika kiset shirururtem dak nungi tenzuka menar, anungji kodangsa tesem kar nung tashidak wara agi ak an asütsü tenzükdir, tanga lima nungbo meshirangertem dena kasa tesem nung aliba ak mesüra antemji tepseter ali telong nung jungjunga rema yutsür aser iba temenokji government-i shiruru metsürtem nemji agütsür. Ajisüaka, asen lima nungbo shiruru meshirangertem dena tepseta endoktsüabajibo yutsür shirangertem dena masü dang ta ser tepseta achir. Ano government tsütsüa tashidak ayimsünga moudaktsüi nokdangtsü atema shiruru meshirangertem dena tepseta endokba temenok agütsütsüabaji yutsür, tashidak wara agi asürtem atema temenoka magütsütettsü. Aji oda, akshi ya jenjang aketba shi asünungji, ak metsürtem asoshi ak ka süa endoktsüabaji aika asoshi küm ka chiyongtsü tokdoker amai asütsü. Ibayongji, aikati akji masüadang ta ser lepa ayoker. Asenok tia maka, shi tajung yokdaksütsü asoshi government nung ketdangsertemi junga merepranger, anungji shi alepertemi pei lepnütsü aleper aser asenoki itemji raktepa alir. Ashi, shitakba nungbo asenoki shi alidang, shi ayokdak tamasa Veterinary purtemi tendanger shi tachitsü junger ta agütsüba kuli kakat reprangdangmatsüla. Joko, Nagaland nung aksüra wara aruba metetmeteta tesem aika nung akshi talubosa yoka angutsü. Itemji karbo aksüra wara agi atong tsübuba agi shirang metenzük dang ta ser lepa ayoker asütsüa akok saka ano karbo, ashiko, shirangba agi masüadang ta ser aleper asütsüa akok. Ano, karbo ak tasü endoktsü apayuba agi akshi ayokdak bener arua lepa ayoker asütsü akok. Itemji shi ayokdak asenoki mebendangtettsü, anungji akok tashi tashidak wara mesüitem tashi akshi machi aremtsüla aser maremtetra taküm alia bener aruagi peisasa awazüa achitsüla. Kiset shiruru anepalu metettsüba tasa kaji, kiset shirururtem dak ya tashidak wara agi tongerbo aneptsü tasak, anungji akok tashi parnokji meshirangdaksütsü merangtsüla. Tanü asüngbo kiset shiruru anepaludak mozü kitema aika lapoka lir, anungji item nung jagi shiruru meshirangdaksütsü atema kechi koma yari nung ajunger ta asüba tasatem asüngdanga anepalutsüla. Ano, shiruru anepalurtemi metetsüba kaji, shiruru metsüdak tesem, ak ki aser an kidangi aodang tetsüng semoktsü balaka asemtsüla aser tema nung agiba süoshi semoktsüa balaka asemtsüla. Itemji asen aliba ki telongi semer maittsü saka ak aser an ki kikümdangji semzüka yutsütsüla. Aji oda, Covid-19 tashidak memenatsü atema kechi koda asenok kümdanga alir, iba amaji ak aser an kidangi aidang mask agi teni tebang nembangtsüla aser yakta dang sapon agi teben jungjunga metsükdoktsüla. Atangji, ajak dang tekümdangba kümdanga alitsüabaji shi lepa ayokertem ya asütsü. Parnok mapaji anogo shia shi lepa ayoktsüabaji lir, anungji shi alep anenra timtem aser takoksa ajurutsü. Iba jagi ansüra mesüra aksüra wara aruyonga parnokbo teti shi ayokdak lir. Anungji, akok tashi shi ayokdak merüka alitsüla aser mask agitsüla. Ashiko, kariibo ak shiranger jenjang dalang agi lepa ayoktsü atidangtsüa akok mesüra kariibo ak tasü dena taküm den kasasa lepa ayoktsü atema bener arutsü akok. Pei taküm dang masü saka kidang kinunger aser tangar taküm timtem lendongi meidaktsütsü atema item tatidangtem nung jagi jenbua alitsüla. Sen tera ajangzüknü dang asenok kibong ajunga taküm samatsüsa tashidak wara agi tongra, kanga sasatsü. Ibaji shiruru metsürtem, shi lepa ayokertem aser shi achirtem ajak asoshi kanga tekümdangtsü mapa ka asütsü.

OLEMSABANG

MYANMAR NUNG KECHI ATALOKDAR

~ Rev. Alem Lemtur, Pastor, Delhi (Osang Zülur)

(Yashi adok nungi...)

- * Alima ajunga nung prokshia aliba Kachin nungertemi CDM ajanga Myanmar Military anema nokdakba nung shilem agidagi, saka China aser Arunachal nung aliba Kachin nungertemi shilem magir.
- * Kachin lima den China-Myanmar artsü nung China-i 'electric fence' yokba ajanga Myanmar sepaitemi kodang iba tesem nung aliba Kachin yimtem amaker, nüburtem mejenteter. Anungji joko tanga lenmang kecha mali raratsüsa akümer.
- * UN aser tanga secular teloktem nungi teyari mangu yongjia, talisa India nung aliba Khristantem nungi timtemer aser rishikangshi tia nung alirtem asoshi teyari ola angashitsü tiemla lir.
- * Pei taküm aser pei nüburtem kümzüksü meji Kachin nung aliba tamangertem; Theological College nung aliba tesayurtema kar dena prangpong amshitsü angazüka frontline nung nokdaka lir.
- * Yimtem nung sepaitemi bomb pokloksür aser injang agi akar, anungi nüburtem aika arem nung jenoka lir. Anungji rescue-team, back-pack medical team, mozü, first-aid training, minor-operation training, chiyungtsü, süki, aser tanga teyari aika nüngdaker.
- * Home-school, protection aser security takok ngua bener aotsü asoshi merangdaki.
- * UN nungi tang tashi teyari mangur, kechiaser UN nung tashi tulutiba kin anaji US aser Russia lir, aser tang Russian pilot-temi Myanmar nung training tagütsüdak lir.
- * Kobi melii Civil War adoktsü nükla nung anguba ajanga Kachin Armed Groups, Shan and Karen Armed Groups koba temalena nungi tenteta liasü, itemji longjemmer Federal Army ka tenteter telongjem nung raratsü merangtsü.
- * Democracy meimertem, aser military yimsüsüba maginertem 'Burmese majority' aser 'minority ethnic groups' nuburtem aika lir, aser tang aliba 'elected politicians,' 'ethnic political parties,' 'ethnic armed organizations,' aser 'civil society groups' lungjemmer National Unity Government (NUG) tentettsü telong nung jembidaki. Iba ya 'legitimate' aser 'equally-represented' sorkar ka asütsü imlar.
- * Myamnar North East den 1600 km shi lir. Naga nunger, Chin-Mizo, Shingpo nunger tesadang ka India aser tesadangka Myanmar nung lir. Ano iba den parnokji teimba ka Khristan. Myanmar nunger NEI nüburtemi yaria arudagi aser ano maneni yaritsü ian timtem mapang nungdaker ta ashi.

India ya democratic country nung nütsüng teimtiba aliba lima ka. India nüchiso ngur nungi lokti mulungba yimden, freedom of speech, human rights, freedom of religion atema noktaker. Pakistan anema ola adokba dak alaka, tanü Myanmar military anema yimym den Indiai iba amai inyaksü ta tejangja tasü tait ola ka PM aser Home Minister amai nungi mali. Ya kanga dang tesasatsü aser alima dang maksü tulu. 27th March Myanmar nung Armed Forces Day amonger aser iba anogo India nungia teshimtet kar oa atenba ajanga India military coup-ji shitak amai sayuogo aser tanü tashi Indiai raraba oset ayoker. Western countries, US aser Asia nung country aikati Myanmar den shishilemba anenogo, saka Indiabo tanü tashi manen ta sensaksem mapang shisema liasü. Kechiba kecha tai makaba nüburtem tepsetsü raraba oset ayoktsü? Iba den Adani Group shishilemba tajangzük mechi Indiai military coup anema ola madoker? Mizoram Government-i Myanmar refugee yaritsüla aser India Governmenti military coup anema yimym agüja ta ayimoktsüogo. Naga nunger yimden lenir ola kechiba mali? Tsüngremi meimchir ajak pa mesükba nung yanglu aser shiangai meimchir taküm agitsü makok. Tsüngrem mezükba nung yanglu ta asüba nungji freedom of speech, liberty ajak dena lir. Military general ishikati tanga lima Cooperate kar den som sür rongsen ketzüng, yimden arakmoka ayubaji aitsütsüla, aser tamangba tashi alenpanga ayutsü merangbaji Lai tesayuba masü. Anungji Naga nunger yimsüsüri anir ochi ola, militaryi tashiyim inyakba mapa anema, aser nüburtemi shimtetba lenir chiyokang aser parnok nem yimsüsüba mendenji meyipa agüja ta ola adoktsü mapang. Nüburtem nem yimden tashi magütsü tashi military government den shilembaba mapa anentsüla ta akhangtsüla. Ano Covid-19 wara mapang arogotem lungjemmer timtemer yariba ama, Myanmar refugee India arura meyipa meyoki tariteptsü nungdak ta lemsatep.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

KBPF-i NSF Solidarity Park nung Easter Sunrise Service agi

Kohima, April 06 (TYO): Meimchir menen alangzüksü atema Yisu Khrista kangki nung asüba sülen asemnübuba nung shia aruba anogomong Easter sentong state tesem ajungalen agiogo; coronavirus wara aliba agi takümbo Kohima nung aliba World War-II Cemetery nung Easter Sunrise Service magitet saka Kohima Baptist Pastors' Fellowship (KBPF)-i NSF Solidarity Park nungang iba sentong ayongzüka agiogo.

KBPF nung amangbapurtem nem jelia metetdaksüba ama Yisu shia aruba temaitsü April 4 anepdang 5:00 ako nung tsüngtsüng atemba den külemi amangbapurtem saaka liasü.

Coronavirus anema telatetbatem benshia KBPF kübok pastor tem State Civil Secretariat anasa NSF Solidarity Park nung adenshia iba sentong agia liasü.

Easter anogomong nung state sorkari state nung tekülem kitem ajak lapoktsü mela, iba denji külemi amangbapurtemi mask agiba den tekümdangtsü balala benshia tekülem sentong nung aden.

Ano külen Nagaland Angh, R N Ravi, Chief Minister Neiphiu Rio, Opposition lenir, T R Zeliang aser State Congress Tir, K. Therie nungeria state nüburtem den Easter salem lemsatepa liasü.

R N Ravi-i, "Asen menen alangzüksü atema Yisu Kangki nung asü aser tanaben shia aru. Pa Tsüngrem, len sayur aser tesayur ka liasü. Pa tesayubatem ajanga alima tesem ajaklen lenirtem ajungshiogo aser nisung billion aika taküm nung temelenshi bener arutsüogo," ta ashi.

Chief Minister Neiphiu Rio-i twitter ajanga, "Easter ya

tasen kümshiba aser saaksalemba mapang ka lir. Easter sayatenya ajanga teimla, tamang, temeim aser tepela bener arutsür, aser item ajakji Tsüngrem taochi ajanga angur. Ajak den tepela aser temoatsü Easter salem lemsateper," ta lemsatep.

Opposition lenir T R Zeliang-i twitter ajanga, "Nenok ajak den tepela Easter Amongnü salem lemsateper. Tan Easter nung Kibuba Tsüngremi asenok nem tesünep, tepala aser azükaru moajang. Pa shia aruba ajanga asenok nem teimla, tepela agütsür aser Pa temoatsütem atema Pa dang pelar," ta lemsatep.

Nagaland Pradesh Congress Committee (NPCC) Tir, K Therie-ia, Easter benjung ajanga asenoki maneni asen taküm nung Khrista sayutsü imlar, ta ashi.

Mali nung Jihadist kiralongrartemi UN Peacekeepers pezü tepset

April 06, 2021: Hokolbarnü Mali kübok Kidal region nung Jihadists kiralongrartemi UN peacekeepers pezü tepsetogo, ta osang ka ajanga metetdaksü.

"Kiralongrartem anema UN Peacekeepers-i tasü itta raraogo. Kasa rara nung peacemakers 19 yiruogo," ta MINUSMA-i sangdong ka ajanga metetdaksü.

Asürtemji Chad nungi lir;

2015 küm tezüngzüktep agiba ama Islam yimsü alia amanga inyakertem aser kiralongrartem den raratsü aser tesem nung tesünep bener arutsütsü atema parnok (peacekeepers) Mali nung teinyakdak liasü.

Tang kiralongrartemi amakba ya yimjung maparen raksatsütsü aser yimjung atema agiba tezüngzüktep raksatsütsü merangba

asalentong ka lir, ta Mission-isa metetdaksü.

Alima nung Khristantem alitsü tamajungtiba linüktem rongnung Mali ya jenjang 28buba nung lir (Open Doors list 2021).

Linük nung Islamic kiralongrartemi sorkar tashi meiti aliba tesemtem agir aser coronavirus wara nungi maongka agia kiralongrar.

Arogo lenir kati Maoists dang sorkar den ken o jembitsü mepishi

April 06, 2021: Tesüiba anogo ishika tsüngda Chhattisgarh state nung Maoists telungpurtemi security sepai 22 tepsetba sülen India nung Khristan lenir kati Maoists dang rara anentsü aser sorkar den ken o jembitsü mepishi.

Arogo lenirtemi ashiba agi, April 3 nü sepai aser telungpurtem tsüngda ghonda pezü shi khatepba mapang nung asürtem rongnung Khristan ka densema lir.

Raipur nung tongti putir, Victor Henry Thakur-i, "Pei

mapa inyakba mapang nung security sepaitem asüba atema jashir. Onoki rara tapu balala ajak aitsür. Ibaji kecha agia medentsütsü makok," ta metetdaksü.

Küm 40 dak tema Maoists telungpurtemi sepaitem den rarar. Maoists lenirtemi ashiba agi, parnoki yimdaklir sensakertem aser tribal nisungtem atema rarar, kechiyong India nunger rongsenkettsüng nungi parnok tajangzük kecha mangur.

April 5 nü osangbener den jembidang putir Thakur-i,

telungpurtemi rara anentsüla aser India sorkar den ken o jembi tenzüksüla, ta metetdaksü.

"Ken o jembiba ajanga dang mangatettep onük ajak bentettsü; rara agi kodanga tebilemtsü onük benteta maru," ta pai ashi.

"Asen Kibur asoba anogomong nung onoki Easter amongdang asen adianutemi asen adianutem tepsetba osang onok nem metetdakja liasü. Onoki asürtem aser parnok kibongtem atema sarasademtsür," ta pai ashi.



Coronavirus wara liaka April 4, 2021 nü Chandigarh nung Christ the King Tenla kidang Khristantem Easter Sunday tekülem sentong nung adenba noksa nung angur.

ANOGO ABEN TSÜNGREM DEN

Kibuba teka

"Saka ki tulu nung hon aser taribi dang alir masü, saka süng aser ali agi yangluba potema lir; aser item kar tetushitsü aser kar metushitsü asoshi lir."
(II Tim. 2:20)

Ozü kima motram dong ana lir aser anaprongla nung motram kanga junga atanger. Süngdong tetsüba nungji aika atang saka squash zü, aser poka zü agi moksepdaktsü. Iba motram toburbo tajung saka ongzüka chidang nung tanang tera kata maliasü. Saka süngdong tera talangba nung atangba motramjibo onsara tanang liasü kechiaser pa kechaia memoksepdaktsü aser anü agi yaloka amenba motram liasü. Tanurtemia iba dong nung atangbaji dang meshi. Tsüngremi motram dong nung tanang aser tarttsü meyi tobur junga atangtsü ajak keter yanglu, saka kabo moksepdaktsü. Yamaji asenok meimchir takütem kar tereprangtsübo tajung saka tanang maliba motram mesüka takümü odang alir (exist), aser kar junga lia aoer (live). Shir odang alir item jagi pei taküm nung Tsüngrem nükjidong mangateti dang alir. Saka lia aotsü meranger item pur taküm nung nükjidong ayur aser Tsüngremer sentongtem metetsü meranga lia aotsü meranger. Tsüngremi asenok taküm shiaji hon aser taribi ama jenjang keta yanglu. Tangar nem mezüngmeshidakja, jenjang maketba taküm ama meyanglu. Naji tetushi taküm ka asütsü Kibubai melunger. Tetushila, lia otetba, aser tanang aketba taküm agi melentsütsü Kibuba dak taochi lir.

Sarasadem

Temeim Oba nia nai yangluba nükjidong angateta taküm tetezü angateta alitsü merangdi. Amen

Serchhip nung Khristantemi election anogo melenshitsü mepishi

Aizawl, April 06 (Agencies):

Mizoram nung Chief Minister Zoramthanga, Arogotem aser opposition party temi Election Commission of India (ECI) dang Serchhip assembly menden atema by election anogo aser vote azüngba anogo na melenshitsü mepishi, kechiyong item anogo ya Khristantem atema tongtimbang anogotem lir, ajisüaka Election Commisison-i tang tashi telemtetba magi, ta ketdangser kati metetdaksü.

Khristan nütsüng timba aliba state nung Serchhip constituency by election April 17 (Honibar) agitsü aser May 2 (Amongnü) vote azüngtsü.

Mizoram nung Seventh Day Adventist Arogo atemabo Honibar anogo ya temeshi anogo ka lir, aser Amongnü yabo Khristan denominations ajak atema temeshi anogo lir.

Hombarnü Mizoram nung Joint Chief Electoral Officer, David Liansanglura Pachuau-i, "Election anogo aser vote azüngba anogo melenshitsü atema mepishiogo, saka ECI-i tang tashi osang memetetdaksü," ta ashi.

Tawa ECI-i CEO dang

Serchhip constituency aser state nung Seventh Day Adventist Arogo nungi voters züngsem kwi lir, ta asüngdanga liasü; ajioda iba osangji ECI nem agütsüogo, ta Pachuau-i osangbener nem metetdaksü.


Tamalen Seventh Day Adventist Arogoi, Arogo nung züngsem aikati iba anogo nungji vote magütsütettsü, kechiyong onoki Honibar anogo nung anisüngzüker aser tekülem agir, ta metetdakja liasü.

Pachuau-isa, Serchhip assembly constituency nung Seventh Day Adventist Arogo nungi voters 248 shi lir aser state nungbo iba Arogo nungi voters ajak agi 16,845 lir, ta metetdaksü.

Taoba ita state chief minister, Arogo balala aser state nung opposition parties-Zoram People's Movement (ZPM) aser BJP-i ECI dang by election anogo aser vote azüngba anogo naprong melenshitsü mepishia liasü.

Yaküm November ita nung anti-defection ozüng kübok MLA, Lalduhoma anendaktsüba ajanga Serchhip constituency menden atema by election agitsüsa aküm.

OLONG PAITEP # 5774



TIPIEN

1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

LANGTSÜNGLEN

2. Hai sür inyak
3. Aor tenüing ka
4. Ali telungi talangka lur
5. Tebang kenyongi mazüoker
8. Ken atema anenzükertem
9. Toktepa noktak
10. Sen
11. Benjong agi
12. Telung nung rizünga ayu
13. Tebang nung enok

OLONG PAITEP # 5773 TELANGZÜBA

TIPIEN :

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar, 6. Belem,
9. Süjak, 10. Aonung, 11. Dokan,
13. Tinu.



ALOKBA-I TETSÜBUTTSÜ MANGDANG KA ANGU

Tenyar kati Naga nung Arogotem aser Tsüngrem lartem dang yamai ashi. Ohoi...Naga nung Arogotem & Tsüngrem lartem...

1. Nenoki Tsüngrem-er rongsen ochimashi ketdang asür.
2. Tsüngrem lartemi Tsüngrem tsübur masü nisungang tsübur.
3. Arogo tenzüker rongnung nukmerem/tsükchitep agi sungogo.
4. Tsüngrem tenzükertem aika rongsen agi tenuk pokdaksüogo.
5. Khristar arogo-a alima teraksa/tebenja tzüchi nung asongogo.
6. Arogo-i yimjung yanglutsü melen arogo-a teraksadak denogo.
7. Putirtem & laishirtema yimjung apular masü teraksadak denogo.
8. Anungji Tsüngremi arogotem & Tsüngrem lartem dang mepelar.
9. Shibai/shirnoki yimjung mapa anemer parnok jibo aiatai asütsü.

Tai-tatok magütsütsü...Semchisemnur tashi merenshitsü.

"Alokba asükshijang meronga aoksar saak "

Lilir : L.Kika Pongener.

TANÜBO NAI LANGZÜANG

Q. BIMSTEC Technology Transfer Facility ya _____ nung amenoktsü asalentong yangludat.

- A.India B.Thailand C.Sri Lanka D.Nepal

===== (Taruba adok nung onoki langzütsü)

YASHI ADOK TELANGZÜBA : Abu Dhabi

AO OSHI ANGAZÜKDAK:

TANÜ ANGAZÜKTSÜBA OJANG

Ayaro

(n) Aonung tajung salem (good night)

- * Aonung shia onok mejangdang kati ka dang ayaro shiteper.

Ayazü

(v) shiruru tila senzüba (movement of insects)

- * Tanang alidak meja telok arua ayazü.



Tir Yimym

NAI-A YA METETTER MA?

AMAZON PRIME NUNG SAYUTSÜ ALIBA SHOW ASER MOVIE: APRIL 2021

- | | |
|---|---|
| * Girl From Monaco (2009) | * Somewhere (2010) |
| * High-Rise (2016) | * Wander (2020) |
| * Pulse (2005) | * Merantau (2010) |
| * Ragnarok (2009) | * Muay Thai Giant (2011) |
| * The Answer Man (2009) | * The Hero Of Color City (2014) |
| * The Priest (2009) | * Venus And Serena (2013) |
| * Trollhunter (2011) | * The Artist (2012) |
| * THEM - Amazon Original Series: Limited Series | * Arrival (2016) |
| * Paranormal Activity 4 (2012) | * Barry Munday (2010) |
| * Spontaneous (2020) | * Harlem Aria (2010) |
| * Burden (2020) | * Kiltro (2008) |
| * Cézanne Et Moi (2017) | * The Commune (2017) |
| * Terror's Advocate (2007) | * The Warlords (2010) |
| | * Tom Clancy's Without Remorse - Amazon Original Movie (2021) |

SUDOKU # 5817

	5	1	6			7	3	9
7		8			5		2	1
						4		
	9		5					
	8			1	2	9		
6								
			1	4	2		5	
		2				1	6	4
4	1	5	3	9			2	

TELANGZUBA # 5816

	7	4	1	6	9	5	8	3	2
6	2	9	1	8	3	5	4	7	
	8	5	3	4	7	2	1	9	6
	5	9	7	3	2	8	6	1	4
	3	6	4	7	5	1	2	8	9
1	8	2	9	6	4	7	5	3	
	9	3	8	2	1	7	4	6	5
	2	1	6	5	4	9	3	7	8
4	7	5	8	3	6	9	2	1	

OJANG LUTEP # 5361

LOTEK	:				
NGNU	:				
TUULR	:				
LATIR	:				
AKAJ	:				
NÜKE	:				
SÜRMEA	:				
ÜBKENO	:				
NGDANÜKA	:				
ERAKÜM	:				

OJANG LUTEP TELANGZÜBA # 5360

PEI AJANGZÜKTSÜ IMLAA TANGAR ASHIOKJA INYAKDANG MEYIPER ASEN TAKOKSA ANGU

TAN HOPTA ATEMA - KOMA SÜLA ?

Q. Myanmar nung nübortem par lima nung sepaitem tsübuba agi süngjema melitet, parnok meyirijang anasemka Nagaland nung khien atema tejenokdak bushia arua nunga koma süla ?

Olong 20 shi nung April 09, 2021 tashi nung iba telangzüba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.



Dumurjola stadium nung West Bengal Assembly election atema BJP candidate tem asoshi nüboyimtsüba sentong nung Ato Kilonser Narendra Modi-i shilem agiba noksa nung angur.

Osang tai agütsüba ajanga mepetmesü adoker: PM

New Delhi, Rongchii/April 6 (Agencies): Ato Kilonser Narendra Modi-i Mongolbarnü, yimden yimsüsüba nung mepetmesü adokdaksütsü atema par sorkar indang osang tai prokshidar, ta ashiba den BJP züngsemtem dang parnok indang osang tejangja nüburtem nem agütsütsü ayongzüük.

Par party 41buba foundation day amungba anogo o jembiba mapang Modi-i, aluyimertem ali agintsü, nisung kar indang lisopur jenjang agintsü, reservation agintsü mesera temzüng ozüing melenshitsü ta teyazü osang nisung aser lokti kari prokshidar, ta ashi.

Item teyazü osangtem ya par sorkari benokba farm laws, Citizenship (Amendment) Act aser labour laws dak ajemdaker prokshidar, ta pai ashi.

"Asa benokba politics idaki keta lir. Iba ya rongrong adokdaksütsü atema tasa tulu

ka koba ken o tangatetsü tim mangatetdaksüi aser tetsübu aitdakja linük nung yimden yimsüsüba mesüngjemteti kümdaksütsü nükjidong nung inyakba maparen lir," ta pai ashi.

'Nation First' mantra indang lepshi PM Modi-i ashiba agi, Bharatiya Janata Party-i, party ya kijang dang nungi tuluba aser linük ya party dang nungi tuluba ta tangatetba nung teti inyaka arudar.

"Iba inyakyim ya Dr Syama Prasad Mookerjee mapang nungi tang tashi benoka arudar," ta Ato Kilonser-i ashi.

Kasa mapang nung PM Modi-i, party yanglushiba nung shilem tulu agiba atema Lal Krishna Advani aser Murali Manohar Joshi nunger nem tenüngsang agütsü.

Paiza, Article 370 agina Kashmir nunger nem temzüng ozüing kübok temeden agüja par sorkari Syama Prasad

Mookerjee indang nükla (one India) ataloktsüogo, ta ashi.

BJP ya Syama Prasad Mookherjee-i 1951 küm tentetba Bharatiya Jana Sangh nungi jakzüüba lir. 1977 küm Jana Sangh ya party kar den lokteper Janata Party aküm.

1980 nung Janata Party National Executive Council-i, party aser RSS naprongla nung züngsem ayuba atema züngsem kar nem tenokdangba agütsü. Iba ajanga taoba Jana Sangh züngsemtem party toktsütsüsa aküm aser party tasen ka tentet. Iba sülen BJP ya 1980 küm April 6 nü tentet.

Jaishankar aser Lavrov na Delhi nung ajuruteper

New Delhi, Rongchii/April 6 (Agencies): External affairs minister S Jaishankar aser Russia External affairs minister Sergey Lavrov na Mongolbarnü linük yimtiba nung ajurutepegogo. Tenati New Delhi aser Moscow na tsüingda bilateral ties aser rongsenketsüng nung tesendaktep indang lepa reprangshi, aser Russia lenir Vladimir Putin-i taküm küm tatemlen India semdangtsü imla aliba indang sensak asem.

Lenir ana yagi külem sangdong ka agütsüogo, kong Jaishankar-i ashiba agi, tenati International North-South Transport Corridor aser Chennai-Vladivostok Maritime Corridor indang sensaksemogo.

Lavrov, anogo ana atema India-i arua lir.

"Onoki Russia anüdoklen maongka aliba dak rangloker rongsenketsüng tesendaktep atema sensaksemogo. Onoki International North-South

Delhi nung aonung curfew benoker

New Delhi, Rongchii/April 6 (Agencies): Delhi sorkari Mongolbarnü, linük yimtiba nung Covid-19 tashidak menar tali küma aoba nokdangtsü atema aonung 10 nungi anepdang 5 tashi curfew benoktsü telemtetba agiogo. Iba curfew ya April 30 nü tashi benoka atatsü.

Yimti nung Hombarnü nisung 3,548 dak tashidak potet aser nisung 15 tashidak agi asü. Tang tashi nung iba tashidak agi nisung 11,096 süogo, ta Delhi health department-i metetdaksü.

Ajisüaka tenokdangba küboki telok karbo maittsü aser kar e-pass bener senzügenpongtsü atema temelaba agütsütsü, koba website www.delhi.gov.in ajanga apply süa agizüktetsü.

Police, prisons, home guards, civil defence, fire services, district administration, pay and account office, electricity, water and sanitation, public transport (Air/Railways/Buses), disaster management aser iba dak sendaka aliba mapatem, NIC, NCC aser municipal services nung inyaktertem tenokdangba küboki maittsü.

Kasa mapang nung doctor, nursing staff, paramedical amala private medical personnel

ajak aser tanga hospitals, diagnostic centres, clinics, pharmacies, pharmaceutical companies aser tanga medical & health services amala hospital services nung inyaktertem I card tejangja bener senzügenpongtsü melatsü.

Maneni mashisa aliba tetsürtem aser shirangertem menokdangtsü aser Airports/ Railway stations/ISBT nung oliorartem ticket tejangja sayur senzügenpongdkaksütsü.

Maneni state ka nungi ka tsüingda essential/non-essential khutem benshiberaba menokdangtsü. Iba inyakyim atema temelaba balaka agitsü nüngdak mali. Lichaliyongtsü, mozü alitsü, ATM, petrol/CNG stations, security services atema senürtem e-pass sayuba sülenang senzügenpongtsü melatsü. Covid-19 vaccine agi aoertem iba tenokdangba küboki maittsü. Delhi Metro/ public buses/ autos/ taxis tem mapang tatakzüük ka nung inyaksangshitsü melatsü.

Kasa mapang nung iba tetuyuba sülen manidakertem Disaster Management Act, 2005 section 51 nungi 60, IPC Section 188 aser tanga tapet temzüng ozüing dak ajemdaker merenshitsü, ta metetdaksüogo.

India nung Covid-19 wara tamajungba kümogo: Health ministry

New Delhi, Rongchii/April 6 (Agencies): Union health ministry-i Mongolbarnü coronavirus agi kanga mejungi kongshir aliba state tem dang RT-PCR testing shilem 70 agibosa ajungketsü shiogo. India nung anogo ka nung nisung lakh ka tema dak tashi potetba sülen anogo ka lir iba osang metetdaksü.

Health ketdangsürtemisa, India nung tanabuba wave ya mezüing dang nungi tamajungba lir, kechiyong Covid-19 tashidak menar aika potetyonga odar, ta ashi.

"Linük nung wara agi kongshiba tamajungba kümdar. Imbazümalema malitsüla ta tekümdangtsü metetdaksüogo," ta NITI Aayog züngsem Dr VK Paul-i ashi.

Dr Paul-isa tensa tamajungba akümba metetdaksüogo aser Covid-19 tashidak menar ya taoba mapang dang nungi timba kümdar, ta ashi.

"Onoki state sorkartem dang RT-PCR tests ajungkettsü atema shiogo, koba Maharashtra nung taoba hopta ishika ajema kümogo. Maharashtra nung taoba hopta RT-PCR test ajanga shilem 60 dang tendang. Onoki state tem dang RT-PCR test shilem 70 mesera iba dak tema

agitsü shiogo," ta Union health secretary Rajesh Bhushan-i ashi.

Ketdangsürtemisa, Chhattisgarh nung tensa tamajungba akümba ya tebilemtsüka kümogo, ta ashi.

"Chhattisgarh ya onok atema tebilemtsü ka kümogo. State tilaka dang süaka iba state nungi linük nung total Covid-19 cases shilem 6 aser asür shilem 3 lir. Chhattisgarh tanabuba wave nung tensa tamajungba kümdar," ta Bhushan-i ashi.

"Punjab aser Chhattisgarh nung nisung asüba ya tebilemtsüka kümogo," ta pai shisem.

India nung wara agi Maharashtra tamajungtiba kongshir lir aser iba state nung linük ajunga senteper tashidak menar shilem 58 aser asür shilem 34 lir, ta ketdangsürtemi ashi. Parokisa tashidak agi asür shilem 4.5 shi Punjab nungi lir, ta metetdaksü.

Tensa asadangtsü atema Union health minister Harsh Vardhan, state aser union territories (UTs) 11 nungi health ministers tem den sensaksemtsü lir. Ato Kilonser Modi-ia Brehostibarnü state chief ministers tem den linük nung Covid-19 tensa indang sensak asemtsü.



Linük ajunga nung coronavirus tashidak keta alir tali potetyonga aoba mapang Srinagar nung mapa inyaker kati COVID-19 centre ka merektetba noksa nung angur.



New Zealand Ato Kilonser Jacinda Ardern-i Wellington, New Zealand nung Australia den quarantine mesüi senzusenpongtsü sangdongogo. Kidanger linük ana tsüngda quarantine mesüi senzusenpongtsü atema temelaba agütsüba ajanga coronavirus wara ajanga pildaktsüba kibongtem aser alimapenzürtem achaayangtsü atema anisüngzük agütsütsü.

Indonesia, Timor tzümetsüng lendong nung asür 160 adenogo

Lembata, Rongchii/April 6 (Agencies): Indonesia aser East Timor nung tzümetsüng aser anentsüh agi yimtsüngtem aponger aoba nung samara alirtem Mongolbarnüa teküzmükertemi maneni bushiogo. Iba lendong nung nisung 160 dak tema süogo aser nisung meyrejang aika talidak makai kümogo.

Tzünglu medangi aruba den Seroja yipru agi yimtsüng tilatem talitsü mejungi raksatsüogo, aser iba ajanga nisung 10,000 shi kidanger linüktemi teküzmükba bushia jenshiogo.

Indonesia's disaster management agency-i ashiba agi, Deobarnü lendong atalokba sülen East Timor anasa asetkong tilatem nung nisung 130 asüba parnoki mangaokogo aser ano nisung 34 asür rongnung züngoksemogo.

Indonesia nung teküzmükertem samara aliba nisung 70 tang kanga aritepa

bushidar aser parnoki jana tenem ama nangdena aliba agintsü asoshi diggers tem amshidar.

Yipru agi yimtsüng ka nungbo kitem tenem nungi Lembata asetkong nung tzüküm tonga oner ao, kong lokti karbo meshi meshia oktokogo.

"Iba tesem nung tali majungtsü," ta Waimatan yimtsüng indang jembiba mapang Lembata district official Eliyaser Yentji Sunur-i ashi.

"Iba tesem nung nisungtem melidaktsütsü. Aginüang taginü parnok idaki tanaben melidaktsütsü," ta Yentji-i ashi.

Waimatan nung alir Onesimus Sili-i ashiba agi, Deobarnü parnoki kechi atalokerar mejangjaba mapang tzümetsü agi parnok aliba tesem raksatsü.

"Ayaterem nung onoki ola tulu angashi aser onoki anasa volcano adoker ta bilem.

"Tzümetsüng arur ta jangjaa akümba mapang nungbo kitem aponger oatoker liasü," ta pai ashi.

Linük anaprongla nung ketdangsertem nüburtem nem tejenokdaksü agütsütsü aser kasa mapang nung Covid-19 tashidak prokshia meyoktsü atema kanga aritepa inyakdar.

Mongolbarnü East Timor nung coronavirus tashidak agi mezüngbuba arishi küm 44 tain tetsür ka süogo.

Nütsünyongsük million 1.3 aliba asetkong tila ya Indonesia aser Australia yongtsü nung lir, koba dang Timor-Leste ta ajar. Wara poktetba sülen tashidak menatepa aoba nokdangtsü atema parnoki takaratiba nung arrtsü shibangja liasü.

Ajisüaka tang lendong atalokba ajanga tashidak tali menatepyonga aotsü ta tsübua bilemer, kechiyong linük yimtiba Dili aser tanga tesemtem nung tejenokdak nisung meyrejang aika nongtepa lidar.

Pakistan nung arishi 80 aser tema pur vaccine agütsütsü

Islamabad, Rongchii/April 6 (Agencies): Pakistan nung coronavirus tashidak poktetshir aliba azüoktsü atema inyaktepba mapang lisopur arishi küm 80 aser temapurtem nem pei kidang COVID-19 vaccines agütsütsü atema telemetba agiogo.

Mongolbarnü sangdong ka ajanga Ministry of National Health Services-i, Pakistan nung taoba ghonda 24 tsüngda COVID-19 tashidak agi nisung 103 asüba aser nisung 3,953 dak tashidak potetba metetdaksüogo.

March 25 nü nisung 4,368 dak tashidak potetba sülen taoba ghonda 24 tsüngda nisung 3,953 dak tashidak potetba ya tajemtiba liasü. April 1 nü nisung 5,234 dak tashidak potetba

metetdaksüogo. Pakistan nung tang tashi nung nisung 696,184 dak coronavirus tashidak potetogo aser tashidak dak sendakba asür 14,924 jungogo. Kasa mapang nung nisung 3,500 temang kanga mejungi lir.

Hombarnü Minister for Planning and Development Asad Umar-i, linük nung arishi küm 80 aser temapurtem nem pei kidang vaccine agütsütsü ta sangdongogo. Paisa, lemluwa tonga arur asünung tantsür tamburtem vaccination centre tem tonga arutsü aser mozü agitsü atema mapang talangla atatsü atema timtem asütsü, ta ashi.

Official data ajanga Pakistan nung April 3 nü tashi nung nisung 936,383 nem vaccine agütsür aliba sayuogo.



NASA-i sayaba noksa nung Baikonur Cosmodrome, Kazakhstan kübok site 31 nung Soyuz rocket meketa service structure ajungketer aliba angur. Expedition 65 NASA astronaut Mark Vande Hei, Roscosmos cosmonauts Pyotr Dubrov aser Oleg Novitskiy nunger Soyuz MS-18 spacecraft nung April 9 nü anünglaki atutsü renema lir.

Myanmar nung longkak aitertemi Yangon yimtung sentsü temerem agi nübangtsü

Yangon, Rongchii/April 6 (Agencies): Myanmar military junta anemertemi Bodhbarnü linük nung yimti tulutiba Yangoon yimtung sentsü temerem agi nübangtsü. Sepaitemi longkak aiter noklang aika tepsetba temaitsü parnoki iba maparen inyaka liasü.

February 1 nü military-i sorkar atsüngtokba sülen linük mepetmesü nung lir aser tang tashi nung nisung 570 shi tepsetogo aser security force temi nisung 3,500 shi puogo, shirnok timba tang tashi tepuokdak yua lir, ta Association for Political Prisoners (AAPP)-i Mongolbarnü ashi.

Security-i tashiyim amshia nüburtem azüoktsü merangba anema Yangon yimti nung alirtemi Mongolbarnü anepdang yakta saka lenmang aser bus

atadak tesemtem sentsü temerem agi nübangtsü.

"Azü ano makong lir," ta sentsü temerem agi zülutsür aliba osang ka nung shia liasü.

Ano tanga osang ka nung "azü chiyongtsü malang itasen achitsü atema nüburtem tetepset," ta shia liasü.

Military-i sorkar tanaben meyipa aruba anema Myanmar ajunga nung joko ita ana nüburtemi meit adoka longkak aita arudar. Myanmar nung 1962 nungi 2011 tashi military yimsüsüba kübok teyari kecha mongui arur mapang tatsüka atema nüburtem mulungba nung sorkar tenteter oya liasü.

Longkak aitertemi kari iba movement ya "spring revolution" ta ajar kong sorkar inyakyim tashi mait kümdaktsütsü atema yimtung nung longkak aita

senzüba, azü metokshi jenjang balala agiba aser civil disobedience campaign ayongzuka agiba densema lir.

Tawa military-i broadband wireless internet shimbangsüba den hopta tepeyong mobile data services shibangtsüba ajanga sentong ayongzüksü tasak kümdaktsü, kechiyong iba ajanga dang linük nung tatalokbatem indang osang prokshir.

Osangbener kar densema social media amshitertemi Mongolbarnü Mandalay yimti nung wadang balala nung mapa inyakterem longkak aita yimtung süa aoba noksa lemsatepogo. Parnok rongnung karbo gas masks semer liasü aser parnoki army anemertemi amshiba temaitsü three-finger salute agüja liasü.

Hombarnü longkak aitertemi

lenir Aung San Suu Kyi indang noksa bener longkak aitogo aser alima kintem teyari meshia liasü.

Ketdangsertemi celebrities, models aser influencer tem aika aputsü ozüing agütsüogo aser Mongolbarnü nüngtugu comedian ka Yangon yimti nung puogo, ta Mizzima news site sangdong ka ajanga metetdaksü.

Nüngtugu osangbener Sithu Aung Myint-a aputsü bushirtem rongnung densema lir. Facebook ajanga pai, pa daka lendong keta lir ta bilemba atema pa kanga nema atanger ta ashi.

"Coup council shirnoki ozüing alema inyaka arudar parnoki na linük ajunga den ozüing raksar ka ta sangdongra, na kanga pelatsü kechiyong iba mepetmesü nung naa tongtibang

ta agizüker," ta pai zülutsü.

"Ner chirnurtem na agi nema tangdaktsütsü," ta pai ashi.

Army-i tentetba democratic inyakyim ka kübok general tem aser Suu Kyi-i aniba civilian sorkar na tashi lemsar inyaka aruba chirepba sülen longkak aitertem aser wadang balala nung mapa inyaktertemi military anema anogoshia longkak aita arudar.

Suu Kyi'er party-i November ita election akok aser military tashi ajemtsütsü atema constitution melenshitsü nangzuka liasü.

Election commission-i election inyakyim nung ochi mashi inyakyim kecha mali ta shiaka military-i mangai sorkar atsüogogo aser mapang tejangja ka magütsü election agishitsü nangzükogo.

India nung Triumph Trident 660 sayaogo

Mumbai, Rongchii/April 06, 2021 (Agencies): Motorcycle jangrartemi kanga dang yongya ataba Triumph Trident India nung sayaogo. India nung Trident jenjang sen lakh 6.95 (ex-showroom, pan-India) alitsü.

Trident motorcycle nung 660cc liquid-cooled den in-line three-cylinder engine inoka yanglutsüogo. Iba engine ajanga 10,250 RPM nung 81 PS power aser 6,250 RPM 64 Nm torque agütsür. Engine inyakyim tsütsü nungittsü atema 6-speed gearbox den slip & assist clutch aser accessory ama quick-shifter angutsü.

3,600 RPM tashi nung motorcycle engine yagi torque shilem 90 agütsür, koba city telungtet nung motorcycle ya ayong ayonga anishitettsü. Iba den külemi, motorcycle nung Ride-by-wire feature dena lir aser riding modes balala teyari agia colour TFT instrument cluster ajanga switch cluster-mounted control tem amshitetsü.

Item feature den bendenloksema, Triumph-isa iba motorcycle nung accessory ama Bluetooth module den GoPro functionality support agütsütsü. Tanga feature rongnung iindicator densema all-LED lighting, kong self-cancelling functionality dena switchable Traction Control aser ABS inoksemtsüogo.

Triumph-i Trident model nung Michelin Road 5 Tyres, Showa upside-down front forks aser preload-adjustable mono-

shock inoktsüogo. Braking atema tetsüing anaprongla nung disc brakes den Nissin calliper inokja lir.

Iba motorcycle seat metong nung 805mm talang alitsü aser talirtemi 'lower aser higher' seat option accessory ama alitettsü. Motorcycle nung 14-litre fuel tank angutsü aser touzük seret 189 alitsü.

Trident tejaklen round LED headlamps, digital instrument cluster aser tesülen LED taillight angutsü. Motorcycle

number plate housing ya swingarm-mounted tyre hugger nung dena lir.

Three-cylinder engine aliba ajanga middleweight motorcycle segment nung Trident indang jenjang balaka kümstsür. Shishilembadak, iba segment motorcycle timbaka nung four-cylinder engine mesüra twin-cylinder engine keta lir. Street Triple model nung aluminium body dena lir, saka Trident nungbo Triumph-i steel chassis amshia yanglutsü.

MULUNG NEN O



1930


05-04-2021

Temeimtiba tsürabur, **Late NUKSHISONGLA**, mapang tatsüka temang mekokmein aliba mapang nungi tasüba anogo tashi, kija, kibong, arogo, yimten, kiyongkinartem, medemertem, lokti balala aser temeimer shirnokisa sarasadem, nübu aser rongsen agi yaritepogo, nenok ajak dang kanga pelaba lemsateper.

Teyanglur Tsüngremi nenok ajak maneni talubosa moajangma ta ozü sarasadem.

Temeim kinungertem aser semchirtem.

KIBONG KÜMER KÜM 50 AJUNGER



07:04:1971 - 07:04:2021

A.Chubayanger Jamir & I.Anungla Pongen (Mopungchuket)

Kibong kümer küm 50 tashi ozü tsürabur ana nem arishi aser taküm tajung moatsüba asoshi Tsüngrem tenüing asanger aser ano maneni nena nem arishi aser anema aliba tepela taküm moajangma ta onok sarasadem.

- Temeim Chirnur, Semchirtem aser Kinungertem.

OFFICE OF THE LONGKONG VILLAGE COUNCIL, MEDEMSANGER PUTU

P.O.Chuchuyimlang. B.P.O.Longkong.

Pelaba Lemsateper

25th March 2021 anogo Ozü Longkong Yimdak Kitsük kironng lendong tulu ajanga tesama aser takoksa jenti ajurur alidang Administration-i anir lokti balala aser kija kibong shirnoki-sa temeim mapa sayua rongsen, nübu, shisatsü aser sarasadem agi yaritepogo, nenok ajak dang kangasa Pelaba Lemsateper.

Takoksang Tsüngremi nenok tali moajangma. Ajaki yaritepba rongnung temeim mapa Yimsüsür aser Arogo ajanga sayubatem zülusemtsür.

- Honorable Minister Shri.Tongpang.Ozüküm.
- Deputy Commissioner Mokokchung.
- District Disaster Management Officer Mokokchung.
- Superintendent Of Police Mokokchung.
- Fire & Emergency Services Mokokchung.
- OC Mokokchung.
- SDO Civil Changtongya& DB.
- Shri. Maongyanger JE Chuchuyimlang.
- All Assam Rifle Ao Union.
- REM Club (Royal Enfield Mokokchung).
- BJP Mokokchung District & 24th Angetyongpang Mandal.
- Ao Senden.
- Ao Kaketshir Mungdang
- Langpangkong Tzükong Mungdang.
- Langpangkong Kaketshir Mungdang.
- Langpangkong Union Mokokchung Town.
- Chakpa Putu Menden & Baptist Arogo.
- Yaongyimti Old Putu Menden & Baptist Arogo.
- Yaongyimti New Putu Menden & Baptist Arogo.
- Phangsang Ad-hoc Town Committee & Baptist Arogo.
- Phangsang Ao Union Telongjem.
- Salulenmang Putu Menden & Baptist Arogo.
- Mongsenyimti Putu Menden & Baptist Arogo.
- Mongsenyimti Compound Baptist Arogo.
- Chuchuyimlang Putu Menden.
- Chuchuyimlang Town Yimden & Baptist Arogo.
- Unger Putu Menden & Baptist Arogo.
- Changtongya Baptist Arogo.
- Changtongya Yimsen Baptist Arogo.
- Kelingmen Baptist Arogo.
- Asangma Baptist Arogo.
- Yaongyimsen Baptist Arogo.
- Nükshiyim Baptist Arogo.
- Merangkong Baptist Arogo.
- Tuli Lenden Baptist Arogo.
- Kangtsüng Baptist Arogo.

- Yajang 'A' Putu Menden & Baptist Arogo.
- Longpa Baptist Arogo.
- Mopungchuket Putu Menden & Baptist Arogo.
- Impur Baptist Arogo.
- ABAM Impur.
- Süngratsü Putu Menden & Baptist Arogo.
- Yisemyong Ad-hoc Town Committee & Baptist Arogo.
- Alcoholic Anonymous Yisemyong.
- Longmesa Putu Menden & Baptist Arogo.
- Chuchuyimpang Putu Menden & Baptist Arogo.
- Alisüngküm Baptist Arogo.
- Tzüsapang Baptist Arogo.
- Süngkumen Baptist Arogo.
- Mokokchung Compound Baptist Arogo.
- Artang Baptist Arogo.
- Artang Youth RON'S Mokokchung.
- Kümlong Baptist Arogo.
- Ngati Baptist Arogo.
- CTC Aolijen Baptist Arogo.
- UngmaPutu Menden & Baptist Arogo.
- LongsaPutu Menden & Baptist Arogo.
- LongkhumPutu Menden & Baptist Arogo.
- MangmetongPutu Menden & Baptist Arogo.
- Settsü Baptist Arogo.
- Grace Baptist Church Yimyu Mokokchung.
- Sapangya Compound Baptist Arogo.
- Chungtia Baptist Arogo.
- Aliba Baptist Arogo.
- Changki Baptist Arogo.
- Dibuia Baptist Arogo.
- Kohima Ao Baptist Arogo.
- Shillong Ao Baptist Arogo.
- Pongching Putu Menden & Baptist Arogo.

Sdl/-

M. Lepden Jamir

Chairman

Longkong Village Council

- Atola Supong Shillong.
- Mr & Mrs. K.Temjen Jamir, Editor Tir Yimyim
- Rev.Yapang Mollier ABAM.
- Mr & Mrs.Limawapang Lusang Kohima.
- Mr. C.Wati, Impur.
- Mr & Mrs. Sütsüngkaba, Ungma.
- Mr & Mrs. Imnaonen Pongen Ungma.
- Mr & Mrs. Katemba.Longmisa Mokokchung.
- Mr & Mrs.L. Matong.Jamir.Yajang'A'.
- Mr & Mrs. Selichum Thongtsu Kohima.
- Mr & Mrs. Abei Rupis Sovima Village Dimapur.
- Longkong Senso Telongjem Yisemyong.
- Longkong Senso Telongjem Mokokchung.
- Longkong Senso Telongjem Dimapur.
- Longkongtsür Telongjem Mokokchung Town.
- Mr & Mrs. M. Jongshi Dimapur.
- Mr & Mrs. R. Imtinungsang Pastor.
- Mr & Mrs. Jongshimanen Pastor.
- Mr & Mrs. R.Merennungsang.Imsong. Mokokchung.
- Mr & Mrs. Imnasashi. Mokokchung.
- Mr. S.N.Süngkum Jamir Assistant District Education Officer.
- Mr & Mrs. S. Ngangshi Jamir JE RB.
- Mr & Mrs. Imnatemjen, Mokokchung.
- Mr & Mrs. Moayanger, Yisemyong.
- Mrs. Talijungla.Mokokchung.
- Mr. Imkümmere & Miss.süngjemsangla.
- Mr. Benjungwati Teacher.
- Miss. Süngjemlila Teacher.
- Mr. Sashirenba Teacher.
- Mr. Limaküzmük Teacher.
- Mr. Talimeren Longkong.
- Mr & Mrs. Purtemsü Longkong.
- Mr & Mrs. Nüngsangmanen Mokokchung

Sdl/-

P. Imkong Aier

Pastor

Longkong Baptist Arogo

1buba Ntu Martyrs Open Volleyball Tournament tenzükogo



Mongolbarnü (06.04.2021) Ntu Village kubok 1st Ntu Martyrs Open Volleyball Tournament tenzükba sentong nung Advisor for Water Resources Department, Namri Nchang-i jembiba yangi angur.

Dimapur, Rongchii/April 06, 2021 (TYO): Mongolbarnü (06.04.2021) Tening Sub-division, Peren District kubok Ntu Village nung 1st Ntu Martyrs Open Volleyball Tournament lapokba sentong agiogo. Iba asayamung lapokba sentong nung Advisor for Water Resources Department, Namri Nchang alakteta tejaoker ama aruagi denogo, ta sangdong ajanga metetdaksü.

Ntu yimtsüing asoshi taküm bendanga agütsür (martyr) nisung pungo bilemteta iba asayamung ayongzucker. 1950s mapang, iba yimtsüing aser Naga linük kümzüksü mechi par pungo yagi taküm bendanga

agütsü.

Iba sentong nung Namri Nchang-i, nisung taküm nung saisapong tsütsü shilem agitsü tongtibangtem indang metetdaksü aser pai asayamung nung shilem agir team ajak dang pei dak aketba sempet tajungtiba amshia asayatsü asoshi ajungshia liasü.

Saisapong ya pei sasa angazükba shilem ka ama lir, koba ajanga temang nung teyari agütsüba den külemi lenla balala nung asenok nungitter aser ajungmesor. Saisaponger tajung ka akümtsü asoshi, temang anema aliba den külemi asen teshisadanga teindang alitsüla, ta pai metetdaksü.

Sorkar ajanga saisapong ajungketsütsü asoshi mapatong balala inyakba indang nung Namri-isa jembi.

Khelo India indang jembiba mapang pai, linük nung sempet tajung alir asayartem ajungmesotsü aser parnok jangjatsü asoshi 'Catch them young' tournament tenzüksü asünung, saisapong wadang balala nung takok ngua tejakleni aotsü asoshi sentong nung adener ajak dang merang inyaksü ajungshiogo.

Maneni, kasa sentong nung K. Azanbo aser Neiba Newmai nati o jembi. Iba sentong nung Papibo Pamai menden liasü, ta sangdong ajanga metetdaksü.

Curfew liaka team practice atema Maharashtra sorkari melar

Mumbai, Rongchii/April 06, 2021 (Agencies): Tang, Mumbai nung lockdown den aonung curfew liaka, iba yimti nung anenzüka alir IPL team tem practice atema Maharashtra Sorkari temelaba agütsüogo.

Government of Maharashtra, Under Secretary, Shirang Gholap-i BCCI indang interim CEO & IPL COO Hemang Amin dangi züluba shidi nung, "Mumbai kubok Wakhade Stadium nung IPL match 10 tashi asayatsü lir ta nai (Amin) metetdakja (March 31, 2021 nü, IPL asayamung dak sendakba nung temelaba meshia züluba shidi) lir. Match 10 nungi 9 no aonung 7:30 ako nungi asayatsü renema lir. Asaya mapang telemsa asadanga, Cricket Club of India (CCI) aser MCA (Wankhede Stadium) nung team tem practice atema session ana - 4pm nungi 6.30pm aser 7.30pm nungi 10pm tashi lemsar lir. Iba dak sendakba

nung aonung 8:00 ako sülen, team aser IPL staff tem ground telung nung practice atema temelaba agütsütsü mepishiogo; aser parnok anenzükba hotel nungi ground tashi senzüsebongtsü atema shia aliba mapang sülen temelaba agütsür," ta shia lir.

"Iba temepishiba dak sendakba nung, bio-bubble tetuyuba nung anidaka practice achaayangtsü asoshi temelaba agütsür," ta shidi tatemlen shia lir.

Wankhede ground-staff züngsem timbaka dak Covid-19 negative tendangteta lir.

Maneni, Mumbai Cricket Association pur atema anisüngzüük tukuka ama, Wankhede indang ground-staff züngsem 10, shirnok dak taoba hopta coronavirus tashidak positive puteta liasü, tang parnok ajak negative tendangtetogo, ta sangdong tanga ka ajanga jangjatsüogo.

IPL 2021: Kiran More dak Covid-19 putet



Mumbai, Rongchii/April 06, 2021 (Agencies): IPL 2021 season tenzükba Mumbai Indians aser Royal Challengers Bangalore na asayatsü aliba tejakdang, Mumbai Indians' scout aser wicket-keeping consultant Kiran More dak Covid-19 tashidak putetogo. Social media sabang ajanga Mumbai Indians-i taoba mapang cricket asayar Kiran dak Covid-19 putetba aser quarantine nung mungdar, ta metetdaksü.

Kiran dak iba tashidak putet

yongjia, pa iba wara temaitsü agi shirangba mali.

"Tang tashi nungbo, Kiran temang nung iba tashidak temaitsü agi kangshiba mali aser pa shinga den majurutepdaksü balaka nung anepaludar. Mumbai Indians aser Kiran More nungeri BCCI health tetuyuba ajak nung anidakogo. MI medical team-i maneni dang Kiran More anepalutsü aser BCCI protocol-i melaba ama inyaksü. Tang ama tensa tamajungdang, COVID-19 temzüng nung anidaktsü aser kümdanga alitsü asoshi fans dang mepishir," Mumbai Indians sangdong ajanga metetdaksü.

Tawa, Wankhede Stadium nung inyaker ana - ground staff aser plumber dak COVID-19 putet liasü. Iba yimti nung IPL asaya 10 tashi ayongzüksü asoshi lemezükba sülen, Stadium

nung inyaker nisung ana dak iba tashidak putet.

"Stadium nung nisung asem dak coronavirus positive putet aser par asem rongnung nisung anabo groundsman lir," ta Mumbai Cricket Association-i metetdaksü.

Cricket asayar Axar Patel, Nitish Rana aser Devdutt Padikkal nunger dak-a coronavirus tashidak putetogo. Taoba Honibarnü, iba stadium nung inyaker ground-staff züngsem 10 dak Covid-19 positive puteta liasü, saka parnok timbaka taneptsü nguogo.

Royal Challengers Bangalore opener, Devdutt Padikkal ya par kidang quarantine süa mungdar. Bengaluru nung külem team pur den training camp nung madandang, Devdutt dak iba tashidak putet.

Tokyo Olympics: Water polo test asayamung athir

Rongchii/April 06, 2021 (Agencies): Coronavirus tenokdangba ajanga saisapong ketdangsürtem Japan-i motettsüsa akümba agi Tokyo Olympics water polo test asayamung thitsür, ta Mongolbarnü sangdong ajanga metetdaksü.

Aruya aliba Olympic dak sendakba qualifier aser test asayamung balala athiba sülen, tang iba test asayamung thitsür alitsü. Anogo ana tashi ayonga asayatsü aliba water polo asayamung ya Honibar nungi tenzüksü renemer liasü, saka Japan nung senzüsebongtsü asoshi tenokdangba takang aliba ajanga iba asayamung magitsü

lemtet.

Iba tenokdangba ajanga, 'time-keepers' aser 'record-keepers', shirnok Japan-i arutsü renemer lir, parnok iba asayamung nung shilem magitettsü. Iba dak sendakba nung Tokyo Olympics achaayangertemi telangzüba magütsü.

Alima ajunga asüngba coronavirus wara adoker külen nungi, anogo atsülangtsür aliba Games atema Test asayamung tem taoba hopta nungi tenzükshiogo. Tokyo indang Yoyogi National Stadium nung wheelchair rugby asayamung agiogo.

Ajisüaka, tanüngba Test

asayamung 17 tashi renemer aliba anogotem nung asayatsü atema tebilemtsü tulu adoker.

Taoba hopta, International Swimming Federation (FINA)-i ashiba agi, Japan nungi Olympic qualifier tem tanga tesemi belentsü asoshi asalentong yangludar.

Item asayamung rongnung tan ita asayatsü aliba Diving World Cup aser May atema Artistic Swimming qualifier dena lir.

Hombarnü, Japan Triathlon Union-ia, Covid-19 tenokdangba ajanga May ita Osaka nung asayatsü aliba triathlon World Cup asayamung thitsür ta osang agütsüogo.

MIT Sports Analytics Conference nung Rahul Dravid-i shilem agitsü



Washington, Rongchii/April 06, 2021 (Agencies): MIT sports analytics conference nung jembitsü atema India nunger cricket asayar tejen Rahul Dravid jaokogo. Iba sentong nung cricket atema mezüng panel discussion ayonger alitsü. April 8 aser 9, 2021 nü, "Show Me the Data" omen nung ajemdaker iba conference ayongzüksü, ta sangdong ka ajanga metetdaksü.

Iba virtual conference nung, Dravid den tanga nungtugu cricket asayar talisa Gary Kirsten aser Isa Guha nati tongti shilem agitsü.

India team-i 2011 World Cup takok anguba mapang, Kirsten ya coach team indang coach inyaka liasü. Ano külen Isa Guha-ia England atema asayaogo aser tang, la ya nungtugu commentator ka lir.

Dell Technologies, Director, Alok R Singh-i "Howzdata: How Analytics is Revolutionising Cricket" nung

panel discussion ketdangsüa agitsü.

US nung cricket asaya tsütsü lanurtem ajungmesotsü nükjidong nung Singh-i kanga bendanga agüja inyaka arudar.

Cricket wadang tsütsü asadangshia sensaksemba sentong nung tawa tanü cricket aser nungtugu league talisa Indian Premier League (IPL) indang onüktem benoka jembitsü imlar, ta kasa sangdong nung shia lir.

Tanga session agiba mapang, US nung tongtibang saisapong talisa basketball, football, baseball nung amshiba ama cricket atema-a analytics aser technology tem amshitsü asoshi tangazükba agütsütsü. Tongtibangsa data aser in-game technology ajanga US nung league talisa NFL, MLB, NBA tem nungtugu küma aoba tem medemdanga tanga tesem nunga item inyakyim amshitsü asoshi sensaksem akatsü, ta sangdong ajanga metetdaksü.

BILEMDANGANG

"Inyaksü mulungtetba mapa ka meinyaki yütsütsü tasak."